

DROGA (Marihuana) Ita mata bo! Punto

Pa: Pedro (Shon Pe) Krozendijk

SEÑOR Redactor permiti mi duna mi opinion basa ariba mi experiencia policial di 28 aña den Cuerpo Policial Arubano.

Laga mi pone bon cla dilanti cu e añanan menciona y principalmente durante e añanan cu mi a traha na e departamento e tempo ey na Kinder-en Zeden Politie combina cu Recherche y diferente biaha mi a yuda cu razzia y of "inval" den casnan sospechoso y aresta sea dealernan/ uzadonan, mi NO por corda cu uzadonan cu a bisa cu nan a cuminsa droga prome cu cocaina, heroína, L.S.D. etc. NO, kerido lectornan, nan tur a cuminsa cu MARIHUANA.

Mi a yega di bay cursonan/lecturanan di BNND= Bureau Narcotics and Dangerous Drugs cu despues a bira DEA= Drugs Enforcement Administration. E expertonan aki y den nan tabata tin dokternan cu tabata pone enfasis ariba e hecho cu droga ta mata bo. Punto. KEDA

LEU FOR DI E MALDITO DROGA EY.

Si nos mira bon rond di nos, wak cuanto hende ta droga. Tin ora nan NO sa mes cu nan ta na bida. Mi ta kere cu esaki tambe e expertonan menciona ey kiermen. Pues cu droga ta mata bo. Ki balor un hende asina tin?

Mi ta kere cu un hende NO mester ni purba e marihuana pa curiosidad pasobra e chens ta grandi cu lo bo sigui use. Hobennan si boso ta stima boso curpa, por fabor KEDA LEU for di droga specialmente marihuana pasobra esaki ta e comienso.

Mi tin un proposicion pa esnan cu ta use y propagande o sea pa legalisa pa nan sigui dal e y bay biba na Bushiribana, nan so anto leu for di un comunidad cu ta respecta su mes. Mi ta spera cu nan tene cuenta cu ora pitufo dal nan pa nan NO dal un duik na Boca Mahos cu ta ey banda mes. Nos comunidad tin basta

problema caba sin uzo di marihuana. Dios spaar nos.

Den mi careda policial mi a yega di topa cu hopi hoben cu tabata haci cosnan straño cu despues a resulta cu nan tabata bao influencia di droga. (Marihuana). Un di nan tabata un hoben cu a staca un carne cu cuchiu di e pata pasa door di e carne su barica pa despues e cuchiu keda stanca/pega/claba den tera. Mi a comprende cu ta un di su mayornan e la busca pero no a haya nan of un di nan. Que hubo di e caso tristo cu a pasa na aña 1966 caminda un hoben a mata su tanta cu 2 yiu y herida e casa casi mortalmente. E tempo ey caba marihuana a haci su entrada na Aruba. Nos por sigui bay den historia y mira cuanto daño a wordo haci door di e maldito droga ey. Awendia habri corant y lesa kico ta pasando rond. Ami ta convenci cu hendenan na tino NO ta haci tur e bagamunderianan cu ta sosodiendo ariba nos pida

baranca stima cu yama Aruba.

Nos tur, incluyendo esnan cu ta pro legalisacion di marihuana, pa corda un rato cuanto dolor droga a causa y ta causando den mayoria di nos casnan di famia aki na Aruba.

Ta berdad cu na Hulanda bo por uza 5 gram of ta 15 gram pa uzo personal. Pero awor Hulanda mes kier hala e holoshi patras pasobra ta hopi problema esaki a causa principalmente door di Union Europeo caminda cu fronteranan a wordo habri y cu den e koffie shopnan bo ta haya droga cumpra. No lubida ora bo habri frontera ta tur sorto di hende ta drenta bo pais. Na Hulanda esaki a bay for di man. Ta e hendenan aki ta comete atraco, traficacion di hende y secuestro etc. Nan ta wordo uza door di malhechor intelectual.

BAN sigui BISA NO NA MARIHUANA.